

**ՈՒՇԱՊ ԱՆՉԿԱ ՀԵՔԻԱԹԸ / Հայ ժողովրդական հեքիաթներ, Հատոր VIII / Գուգարք (Լոռի),
Լոռու բարբառ (խոսվածք)**

Ըլել ա, չի ըլել մի կնիկ, ունեցել ա մի տղա: Օրերի մի օր եղ կնիկը խտոր ա ընկել, բերել ա մի ախչիկ: Ախչկանը ծիծ ա տվել, մեկ էլ տեհել ա, որ ախչիկը դառավ Ուշապ, ծիծը պոկեց: Էն սրհաթին վեր ա գձում ու իրան տղին գրկում, փախչում:

Ուշապը մենձանում ա, եղ գեղը սաղ խըմում, թողում ա մի խոզ, մեկ էլ մի դարբին: Մի վախտ որ անցնում ա, եղ տղեն մենձանում ա, ասում ա.— Գնամ տենամ իմ հոր օջախը ինչ էլավ: Գնում ա, տենում ա մի մարդ: Բարև ա տալի, մարդը բարևն առնում ա ու ասում ա.— Ա՛յ տղա, ո՞ւր ես գնում:

Տղեն ասում ա.— Գնում եմ տենամ հորս տունը ի՞նչ հալի ա:

Ասում ա.— Որ գնում ես, ծերքին գնա, էս մերումը մի ասլան կա՝ ծառի տակին վեր ընկած, էն ասլանը,— ասում ա,— քեզ որ տենա, կասի. «Արի գլուխս քորե», մազերը ծառիցը կապե. որ կապես ոչ, նա քի կուտե: Եփոր կապես, նա դանչանք կանե, թե. «Արի եղ արա, ինչ ուզում ես՝ կտամ»: Էնվախտը եղ արա ու ուզե էրկու թուլա իրան փորիցը. որ խոստանա, անպատճառ կտա: Ձագերը որ տվուց, ասա թե՛ մեկ շիու էլ տուր: Որ էն շիուն ածես՝ էն ասլանի քոթոթնին. ուր էլ ըլին, կգան քու կուշտը, քի քոմակ կանեն: Մին էլ,— ասում ա,— հետո տար մի ձի, մի խան կորեկ, մի աման ձեթ, էրկու էլ մու: Որ Ուշապը էտնեղ ըլելիս ըլի, խոզը պտի հեծնի գա, դու կորեկը վեր կածես, խոզը էն կորեկով կըլի, դու կփախչես. եղնա, որ տենուս հասնում ա, ձեթը վեր կածես. ձեթը գյոլ կդառնա՝ խոզը կլեղանա միջին, դու կփախչես, որ էլի հասավ, մի մուը գետնում կտնկես՝ ծառ կդառնա, դու վեր կըլիս ծառին, շիուն կածես՝ ասլանի քոթոթնին կգան, Ուշապին կսպանեն:

Տղեն շնորհակալ ա ըլում ու գնում ա մի ձի վեր ըլում, քշում գնում մերին: Տենում ա մի մենձ ծառի տակին մի ասլան թեք ընկած:

Ասլանն ասում ա.— Ա՛յ տղա, արի՛ մի քիչ գլուխս քորի:

Տղեն գնում ա ասլանի գլուխը մի ձեռով քորում, մի ձեռով մազերը ծառիցը կապում: Եփ որ պրծնում ա, ասլանը ուզում ա, որ դրան ուտի, տենում ա, որ մազերը ծառին կապած ա:

Ղանչանք ա անում տղին, թե.— Արի՛, եղ արա:

Տղեն ասում ա.— Ինձ էրկու թուլա կտա՞ս քու փորիցը, մին էլ շիու, էն վախտը եղ կանեմ:

Ասլանն ասում ա.— Կտա՛մ: Էքուց արի տար քոթոթնին, հըմա մեկի անունը կդնես Ասլան, մեկելինը՝ Ղափլան:

Էքսի օրը գնում ա, քոթոթնին ու շիուն վեր ա ունում ու գնում: Գնում ա հասնում իրանց գեղը: Տենում ա, որ մարդ-մուրդ չկա, վերան ա: Գնում ա իրանց տուն մտնում, տենում ա, որ քիրն օջախի դրաղին նստած ա: Քիրը շատ ուրախանում ա, ախպորը կանչում ա կշտին նստացնում:

Մի քիչ եղը քիրը դուրս ա գնում, գալիս ա ասում.— Քու ձին չորս ոտ ունե՞ր, թե՛ իրեք:

Տղեն հըսկանում ա, որ ձիու մի ոտը կերել ա: Ասում ա.— Իրեք ոտ ունեք:

Մի քիչ էլ կենում ա, էլի դուս ա գնում, գալիս ա ախպորն ասում ա.— Ձիդ կաղնած է՞ր, թե՛ վեր ընկած:

Ախպերը տենում ա, որ ձիուն կերել ա, ասում ա.— Վեր ընկած էր:

Միտք ա անում, որ իրան էլ ուտիլ պտի, վեր ա կենում ու փախչում: Ուշապը խոզին կանչում ա, վեր ըլում ու դրա եղնուց վազում, որ հասնի: Տղեն տենում ա, որ հասնում ա, մի խան կորեկը վեր ա ածում: Խոզը գալիս ա, կորեկը սկսում ա ուտիլը:

Տղեն մի մանկզիլ կտրում ա: Մեկ էլ տենում ա, որ Ուշապը էկավ, հասավ . ձեթը վեր ա ածում:
Որ վեր ա ածում՝ գյուլ ա դառնում, խոզը մտնում ա մեջը, լեղանում:

Տղեն էլի մի մանկզիլ կտրում ա: Մին էլ եդ ա մտիկ տալի, տենում ա, որ Ուշապը հասավ . ձեռի մոմը տնկում ա՝ դառնում ա մի մենձ ծառ, տղեն վեր ա ըլում: Ուշապը գալիս ա ըսկըսում ա ծառը կտրիլ, տղեն շիուն ածում ա, էն սհաթին Ասլանն ու Ղափլանը հասնում են՝ Ուշապին կտոր-կտոր անում:

Չարին ընդի, բարին ըստի:

Աստծանե իրեք խնձոր վեր ընկավ . մինն՝ ասողին, մինը՝ լսողին, մինն էլ ալամ աշխարքին: